

Komunikadu Imprensa Konjunta
Governu Japaun ho NGO Frontline Organiza Formasaun Ekografia ba Médiku
no Parteira sira husi Munisípiu Bobonaro

Dili, 24 Agostu 2024 – Governu Japaun no Frontline, ONG Japaun nian, organiza formasaun ultrasonografia ba médiku no parteira sira Munisípiu Bobonaro nian nu'udar parte ida hosi projetu "Hadi'a Servisu Saúde Inan no Oan nian liuhosi Hasa'e Kapasidade Médiku no Parteira sira iha Munisípiu Bobonaro" ne'ebé hahú iha fulan Marsu tinan ne'e ho valór projetu hamutuk 557,808 dolar amerikanu ne'ebé finansia husi Governu Japaun.

Liuhusi projetu ne'e, Governu Japaun no Frontline hakarak hadi'a qualidade servisu saúde inan no oan iha comunidade Bobonaro, ne'ebé taxa mortalidade inan no kosok-oan aas liu média nasional.

Formasaun ne'e sei tuir matadalan ne'ebé desenvolve ona husi Frontline no hetan aprovasaun husi Ministériu Saúde iha tinan 2021. Liuhosi matadalan ne'e, Frontline fô dalan ba médiku no parteira Timoroan sira atu hetan formasaun ne'ebé kualifikadu no hetan sertifikadu husi Institutu Nasionál Saúde Públika Timor-Leste (INSP-TL) ba dala uluk iha rai laran. Tinan ne'e, médiku no parteira na'in 14 hetan ona formasaun husi Dr. Jose Antonio Gusmão Guterres, peritu projetu nian.

Aleinde formasaun ultrasonografia, Frontline fornese atividade sira hanesan formasaun kuidadu antenatal ba pesoál saúde sira, klase edukasaun antenatal ba inan isin-rua sira, no kampaña sensibilizasaun komunitária ba edukasaun saúde reprodutiva. Liu husi projetu ida ne'e, inan isin rua hamutuk 945 sei hetan asesu ba ultrasonografia obstétrica, pesoál saúde no ofisiál governu nian liu 35 sei hetan benefisiu husi kapasitasaun, no membru comunidade liu 4,000, inklui membru família husi inan isin rua, sei hetan edukasaun liu husi sesaun sensibilizasaun. Esforsu sira ne'e sei kontribui ba redusaun iha taxa mortalidade inan nian.

Durante serimónia enserramentu formasaun ne'e, Embaixadór Kimura hateten, *“Japaun fô apoiu ba konstrusaun nasaun Timor-Leste dezde molok restaurasaun independénsia, no tinan ida ne'e marka tinan 25 asisténsia nian. Tinan ida ne'e, Governu Japaun asina ona projetu neen ba setór saúde, inklui projetu konstrusaun edifísiu foun ba departamentu sirúrjiku, karreta perinatal no seluk tan no atu fornese ekipamentu médiku iha Ospital Nasionál Guido Valadares ne'ebé Sr. Komura, Vise-Ministru Parlamentár ba Asuntu Negósius Estranjeirus Japaun nian, asina ona iha semana kotuk. Governu Japaun sei kontinua servisu hamutuk ho Governu Timor-Leste hodi desenvolve no hasa'e qualidade kuidadu saúde iha Timor-Leste.”*

Sr. Yohei Kawaguchi, Representante Nasaun husi Frontline subliña, *“Treinamentu ida ne'e hanesan oportunidade boot ida la'ós de'it ba pesoál médiku sira, maibé mós ba membru comunidade sira. Partisipante sira hein atu hetan koñesimentu no abilidade sira hodi salva inan sira no kosok-oan sira nia moris”.*

Governu Japaun no Frontline hein katak formandu sira sei kontribui hodi garante katak inan isin rua sira hotu iha Munisípiu Bobonaro hetan atendimentu ho qualidade aas durante sira nia isin rua no partu. **【REMATA】**